

Discurs dal pugiö

Gent da Varés, incöö sunt turnàa chichinsci,
par vess ur Re dur Carnavàl in 'stì vott dì.
L'è bell vess anmò 'na vòlta in sü 'sto pugiö:
a vidé i mè càar busitt ma sa slàrga 'l cöör.

L'è 'na settimàna da gran divertimént
e sarìa bell vidév tücc viscur e cuntént.
L'è la fèsta di bagài, grand e chissessìa:
che la poda mancà mai a tücc l'alegrìa!

Par vott dì trém via robb brütt e pensée gramm
gudémas 'l témp ca vén sénza crüzzi o afàn!
Sü alégar gént semm chì inséma in dul municìpi
dul Carnaval busin, a vidée ul princìpi!

Cunt ul Pin Girometta, ul Regiù, in cumpagnìa
cumìncium a guvernà Varées in alegrìa.